



SLUŽBENE NOVINE TUZLANSKOG KANTONA

GODINA 10 • TUZLA, PETAK, 19. DECEMBAR 2003. GODINE • IZDANJE NA BOSANSKOM JEZIKU • BROJ 13

272

Na osnovu člana 24. stav 1. tačka c. Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00 i 14/02), na prijedlog Vlade Tuzlanskog kantona, Skupština Tuzlanskog kantona, na sjednici održanoj 28. 11. 2003. godine, donosi

ZAKON

O KANTONALNIM POREZIMA

I. OPĆE ODREDBE

Član 1.

Ovim Zakonom uređuju se porezi koje plaćaju fizička i pravna lica (u daljem tekstu: porezi) na području Tuzlanskog kantona (u daljem tekstu: Kanton).

II. VRSTE I RASPODJELA POREZA

Član 2.

Porezi propisani ovim Zakonom su:

1. Porez na dohodak fizičkih lica;
2. Porez na imovinu;
3. Porez na nasljeđe i poklon;
4. Porez na dobitke od igara na sreću;
5. Porez na potrošnju alkoholnih i bezalkoholnih pića u ugostiteljstvu.

Član 3.

Porezi propisani ovim Zakonom su prihodi općina, izuzev prihoda od poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu koji su prihodi Kantona.

Prihodi od poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu koji su prihodi Kantona koriste se za finansiranje socijalne zaštite.

1. POREZ NA DOHODAK FIZIČKIH LICA

A. OPĆE ODREDBE

Član 4.

Porez na dohodak fizičkih lica plaća se prema odredbama ovog Zakona i propisa donesenih na osnovu ovog Zakona.

Član 5.

Obveznik poreza na dohodak je fizičko lice.

Porezni obveznik jest fizičko lice koje ima prebivalište ili boravište na području Kantona, kao i svako drugo fizičko lice iz zemlje ili inostranstva koje u Kantonu nema ni prebivalište ni boravište, a ostvaruje dohodak oporezovan ovim Zakonom.

Član 6.

Osnovica poreza na dohodak poreznog obveznika jeste ukupni iznos dohotka koji porezni obveznik ostvari u Kantonu, zemlji i inostranstvu i to od:

1. dohotka od rada kod poslodavca,
2. dohotka od samostalne djelatnosti i
3. dohotka od imovine i imovinskog prava.

Član 7.

Osnovica poreza na dohodak od rada kod poslodavca jesu neto primanja ostvarena u obračunskom periodu od mjesec dana preko petostrukog iznosa osnovnog ličnog odbitka.

Osnovica poreza od dohotka od samostalne djelatnosti i dohotka od imovine i imovinskih prava jeste dohodak ostvaren za period od godinu dana umanjen za osnovni lični odbitak, ako ovim Zakonom nije drugačije propisano.

Osnovni lični odbitak iznosi 300,00 KM.

Porezne olakšice

Član 8.

Poreznim obveznicima iz člana 6. stav 1. tačka 1. priznaju se porezne olakšice i to:

1. 30% osnovnog ličnog odbitka za izdržavanje supružnika, druge izdržavane članove porodice i prvo dijete.

2. Porezna olakšica iz tačke 1. ovog člana uvećava se za drugo i svako dijete za 10% osnovnog ličnog odbitka (drugo dijete ukupno 40%, treće ukupno 50%, i tako dalje), a za izdržavanje invalidnog člana porodice 20%.

3. Porezna olakšica iz tačke 1. ovog člana uvećava se 30% za svako dijete bez roditelja za koje je određen staratelj, a koji je porezni obveznik po ovom Zakonu.

4. Porezni obveznik, po ovom Zakonu, oslobađa se porezne obaveze ukoliko usvoji jedno ili više djece bez roditelja.

5. Lica čiji mjesečni dohodak u smislu ovog Zakona ili čija druga mjesečna primanja koja se u smislu ovog Zakona ne smatraju dohotkom prelaze osnovni lični odbitak iz člana 7. stav 3. ne smatraju

se izdržavanima. Ako više obveznika, izdržava jedno lice, odbitak za to lice ravnomjerno se raspoređuje na sve koji ga izdržavaju, osim ako se ne sporazumiju drugačije.

6. Osnovni lični odbitak i porezne olakšice se zbrajaju.

Djecom u smislu stava 1. tačke 1. i 2. ovog člana smatraju se djeca koju roditelji izdržavaju.

7. Drugim izdržavanim članovima uže porodice u smislu stava 1. tačke 1. ovog člana smatraju se roditelj obveznika i roditelji njegovog supružnika ako žive u zajedničkom domaćinstvu.

8. Porezni obveznik može koristiti osnovni lični odbitak i porezne olakšice u razdoblju za koje postoji porezna obaveza i u kojem se lica izdržavaju. Razdoblje se zaokružuje u korist poreznog obveznika na pune mjesece.

Ako u porodici ima dva ili više obveznika poreza na ukupan prihod fizičkog lica osnovica iz stava 1. ovog člana smanjuje se za iznos olakšice onom obvezniku koji je ostvario veći ukupan prihod

Ako lica iz stava 1. ovog člana imaju druge vlastite prihode obvezniku poreza na ukupan prihod, od iznosa ukupnog smanjenja osnovice, odbit će se godišnji iznos tih prihoda.

Od osnovice poreza na ukupan prihod odbit će se i iznos koji je obveznik dao u godini za koju se vrši razrez poreza:

- na ime poklona Bosni i Hercegovini, Federaciji Bosne i Hercegovine, kantonu ili općini i vjerskim zajednicama,

- na ime školovanja, specijalizacije i usavršavanje talenata,

- na ime troškova za svaki neotkupljeni patent i tehničko unapređenje u godini u kojoj su patentirani,

- za plaćanje alimentacije po odluci suda,

- na ime troškova liječenja u inostranstvu, medicinski iniciranog od strane nadležne ljekarske komisije.

Smanjenje osnovice po prethodnom stavu vršit će se samo na zahtjev obveznika poreza i na osnovu dokaza koje je obveznik poreza obavezan podnijeti uz prijavu za razrez poreza.

Poreznim obveznicima iz člana 6. stav 1. tačka 2. priznaju se porezne olakšice putem umanjena osnovice, i to:

1. Za 10% od osnovice poreza na dohodak za svakog novouposlenog radnika kojim se povećava broj zaposlenih radnika u godini u kojoj je radnik zaposlen i to tako da ukupno umanjeње osnovice može iznositi najviše do 50%. Ako je novouposleni radnik uposlen u drugom polugodištu olakšice za novouposlenog radnika priznat će se obvezniku u narednoj godini.

2. Ako je novouposleni radnik iz kategorije invalidnih lica sa procentom invalidnosti preko 50% kao i članovi uže porodice poginulih boraca umanjeње poreske osnovice priznat će se u visini od 15%. Porezne olakšice priznate po ovom osnovu ne mogu iznositi više od 75%.

3. Za iznos izvršenih ulaganja u nabavku osnovnih sredstava i ulaganja u kupovinu, izgradnju i adaptaciju poslovnog prostora za iznos izvršenih ulaganja u toj godini, a najviše do visine iznosa osnovice poreza na dohodak utvrđene za tu godinu.

Član 9.

Porez na dohodak utvrđuje se za kalendarsku godinu (porezni period).

Porezna osnovica obračunava se za kalendarsku godinu, a može se obračunavati i za kraće periode (obračunski period) u slučaju da porezna obaveza traje kraće od poreznog perioda.

Član 10.

Porez na dohodak se plaća po stopi od 15% od porezne osnovice.

Član 11.

Porez na dohodak ne plaća se na iznos kamata na štednju u KM i deviznu štednju, kamata na tekuće i devizne račune, kamata od kredita i zajmova, kamata od vrijednosnih papira.

Dohotkom se ne smatraju iznosi primljeni po osnovu osiguranja stvari, odgovornosti, života i imovine.

Dohotkom se ne smatraju primanja koja se dobivaju iz socijalnih, kulturnih i drugih ustanova za koje se ne pružaju tržišne protuusluge i to:

1. Pomoć radi snabdijevanja ratnih vojnih invalida i članova uže porodice poginulih boraca i šehida kao i pomoći civilnim žrtvama rata na osnovu posebnih propisa.

2. Pomoć zbog uništenja i oštećenja imovine uslijed ratnih dejstava, elementarnih nepogoda i drugih vanrednih događaja.

3. Socijalna pomoć po posebnim propisima.

4. Doplatak za djecu i novčana primanja za opremu novorođenog djeteta po posebnim propisima.

5. Prianja invalida po osnovu propisa o zdravstvenom i penzijskom osiguranju i socijalnoj zaštiti, osim plaća i penzija.

6. Državne nagrade.

B. VRSTE DOHOTKA

a) DOHODAK OD RADA KOD POSLODAVCA

Član 12.

U dohodak od rada kod poslodavca spadaju:

1. Plaća koju isplaćuje poslodavac radniku za rad obavljen po uputama poslodavca.

2. Penzije i drugi dohoci iz prijašnjih odnosa po osnovu rada.

3. Prianja po osnovu naknada, pomoći i nagrada koje daje poslodavac ako prelaze iznose propisane posebnim propisom.

4. Sva druga primanja po osnovu rada kod poslodavca i u vezi s radom kod poslodavca.

Dohotkom od rada kod poslodavca smatraju se i:

1. Premije osiguranja života i imovine koje poslodavci plaćaju za svoje radnike i druge osobe, dodatne penzije, te stipendije iznad iznosa utvrđenog saglasno stavu 1. tačka 3. ovog člana.

2. Plaća koju sebi isplaćuje poslodavac - privatni poduzetnik koja ulazi u rashod koji se može odbiti pri utvrđivanju poreza na dohodak od samostalne djelatnosti.

Dohotkom od rada kod poslodavca u smislu stava 1. ovog člana smatraju se i druga primanja koja poslodavac i druga lica isplaćuju radniku u vezi sa sadašnjim, prijašnjim i budućim radom, koja se umjesto u novcu nadoknađuju u stvarima ili u drugom obliku kao što su korištenje zgrada, plovni objekata i automobila, nadoknađivanje najamnine za stanovanje i slično.

Član 13.

Porez na dohodak ne plaća se na:

1. Naknade za vrijeme vojne službe u Vojsci Federacije Bosne i Hercegovine,

2. Naknade pripadnicima Civilne zaštite i drugim licima za djelatnost u okviru Civilne zaštite od elementarnih nepogoda.

3. Naknade plaća za vrijeme privremene nezaposlenosti i spriječenosti za rad koje isplaćuje Zavod za zapošljavanje, Fond zdravstvenog osiguranja i drugi fondovi.

4. Nagrade učenicima i studentima za vrijeme njihovog praktičnog rada do iznosa koji će se propisati posebnim propisom.

5. Prianja studenata i učenika na redovnom školovanju za rad preko studentskih i učeničkih zadruga.

6. Naknade štete zbog posljedica nesreće na radu.

7. Naknade i nagrade koje osuđene osobe primaju za rad u kazneno - popravnim ustanovama i domovima za prevaspitavanje.

8. Prihodi po osnovu isplata koje imaju karakter materijalnih troškova: topli obrok, dnevnice za službena putovanja, putni troškovi, plaćanje stana van mjesta boravka i troškova za odvojen život van mjesta boravka, otpremnine, jednokratne novčane pomoći porodici umrlog radnika do iznosa propisanih posebnim propisom.

Porez na dohodak ostvaren od obavljanja diplomatsko-konzularnih dužnosti ne plaćaju:

1. Šefovi stranih diplomatskih misija akreditiranih u Bosni i Hercegovini i diplomatski službenici stranih diplomatskih misija u Bosni i Hercegovini te članovi njihovih domaćinstava, ako ti članovi nisu državljani ili nemaju prebivalište u Bosni i Hercegovini.

2. Šefovi stranih konzulata u Bosni i Hercegovini i konzularni funkcioneri te članovi njihovih domaćinstava, ako ti članovi nisu državljani ili nemaju prebivalište u Bosni i Hercegovini.

3. Funkcioneri UN i njihovih specijalizovanih agencija, eksperti tehničke pomoći UN i njihovih specijalizovanih agencija.

4. Lica zaposlena kod stranih diplomatskih misija, konzulata i međunarodnih organizacija u Bosni i Hercegovini, ako nisu državljani Bosne i Hercegovine ili nemaju prebivalište u Bosni i Hercegovini.

5. Počasni konzularni funkcioneri stranih konzulata u Bosni i Hercegovini što ih primaju od države koja ih je imenovala za obavljanje konzularnih funkcija.

b) DOHODAK OD SAMOSTALNE DJELATNOSTI

OPĆE ODREDBE

Član 14.

Dohodak od samostalne djelatnosti jeste dohodak od privredne djelatnosti, dohodak od slobodnih zanimanja, dohodak od poljoprivrede i šumarstva i dohodak od drugih samostalnih djelatnosti koje se trajno ili povremeno obavljaju u cilju ostvarivanja dohotka.

Član 15.

Obveznik poreza jeste svako fizičko lice koje samostalno obavlja djelatnost iz člana 14. ovog Zakona, s namjerom da kroz to ostvari dohodak.

Član 16.

Ako više lica ostvaruje dohodak od samostalne djelatnosti zajedničkim obavljanjem te djelatnosti svako fizičko lice plaća porez na dio dohotka koji mu pripada od zajedničkog poslovanja.

Ako ugovorom o zajedničkom poslovanju nije ugovoren način podjele dohotka ostvareni dohodak dijeli se na jednake dijelove.

UTVRĐIVANJE DOHOTKA OD PRIVREDNE DJELATNOSTI, SLOBODNIH I DRUGIH SAMOSTALNIH DJELATNOSTI

Član 17.

Dohodak od samostalnih djelatnosti jeste razlika između prihoda i rashoda.

Prihodi su sva dobra (novac, stvari, materijalna prava, usluge, drugo) koja je porezni obveznik ostvario u okviru samostalne djelatnosti u poreznom periodu.

U prihode ulaze i prihodi ostvareni od prodaje stvari i prava koja služe za obavljanje samostalne djelatnosti i koja se kao investiciona dobra vode ili su se trebala voditi u popisu stalne imovine.

Prihodi, osim prihoda u novcu, procjenjuju se prema tržišnoj vrijednosti.

Rashodi su svi izdaci poreznog obveznika tokom poreznog perioda u cilju sticanja, osiguranja i očuvanja prihoda.

U rashode ulaze samo oni izdaci koji su neposredno vezani uz ostvarivanje dohotka.

U poslovne izdatke ulaze i knjigovodstvene vrijednosti pojedinačno ili ukupno prodanih investicionih dobara koja su se trebala voditi u popisu stalne imovine.

Član 18.

Porezni obveznici koji obavljaju samostalnu djelatnost iz člana 14. ovog Zakona dužni su utvrđivati dohodak na osnovu podataka iz poslovnih knjiga.

Poslovne knjige iz stava 1. ovog člana jesu knjige prihoda i rashoda i knjiga prometa.

Poslovne knjige se moraju voditi uredno i blagovremeno.

Za svaku prodaju, odnosno obavljenju uslugu mora se izdati račun. Oblik i sadržaj poslovnih knjiga i računa te način vođenja poslovnih knjiga propisat će se posebnim propisom, kojeg donosi Ministar finansija.

Ako porezni obveznik ne ispunjava svoje obaveze u pogledu vođenja knjiga te iskazivanja svih prihoda i rashoda, Porezna uprava može procijeniti poreznu osnovicu i utvrditi oporezivi dohodak na osnovu obavljenog nadzora ili poređenjem s poreznim obveznikom koji obavlja istu ili sličnu djelatnost ili na osnovu drugih podataka o poslovanju poreznog obveznika.

Član 19.

U popisu stalne imovine unose se stvari i prava (investiciona dobra), ako njihove nabavne cijene, odnosno troškovi proizvodnje (nabavna vrijednost) premašuju 200,00 KM i ako je njihov vijek trajanja duži od godinu dana. Prava ulaze u popis stalne imovine samo ako je kod njihove nabavke plaćena naknada.

Popis stalne imovine služi za utvrđivanje otpisa (amortizacije).

U popis stalne imovine unose se pojedinačna nabavna vrijednost investicionih dobara, vijek trajanja (korištenja), revalorizovana knjigovodstvena vrijednost i otpisi.

Nabavna vrijednost investicionih dobara koja se unose u popis stalne imovine ravnomjerno se otpisuje u periodu njihovog korištenja.

Ako se investiciono dobro, zbog uništenja više ne može koristiti ili ako se proda tada se njegova vrijednost u cijelosti otpisuje.

Utvrdjivanje amortizacije vrši se po propisima koji važe za pravna lica.

Član 20.

Kao rashodi poreznom obvezniku priznaju se, naročito:

1. Izdaci za materijal, robu, proizvode, energiju i usluge, koji služe za sticanje dohotka u visini nabavne cijene ili troškova proizvodnje i ostali troškovi koji su nastali u vezi sa poslovanjem.

2. Plaćeni porez na promet proizvoda i usluga.

3. Plaća sa porezima i doprinosima poslodavca i zaposlenih priznaju se u visini stvarnih isplata.

4. Otpisi stalne imovine.

5. Izdaci za vlastita motorna vozila i druga sredstva koja služe prijevozu radnika i drugih zaposlenih lica u iznosu od 20% cijene goriva po stvarno pređenom kilometru.

6. Otplata kamata na primljene kredite i zajmove.

7. Izdaci za reprezentaciju do 0,5% od ukupno ostvarenog prihoda.

8. Izdaci po osnovu naknada, pomoći i nagrada koje daje poslodavac, ako ne prelaze iznose koji će se propisati posebnim propisom.

9. Izdaci za dnevnice i troškove službenog putovanja do propisanih iznosa, utvrđenih za pravna lica.

10. Izdaci za stipendije učenika i studenata djece porodica šehida i poginulih boraca, ratnih vojnih invalida i lica u stanju

socijalne potrebe, ako ne prelaze iznose propisane posebnim propisom.

Član 21.

Pri utvrđivanju dohotka ne priznaju se slijedeći rashodi:

1. Porez na dohodak, porez na nasljedstvo i poklone i drugi vlastiti porezi.
2. Novčane kazne i slični izdaci koji imaju kazneni karakter.
3. Zatezne kamate.

UTVRĐIVANJE DOHOTKA OD POLJOPRIVREDNE I ŠUMARSKJE DJELATNOSTI

Član 22.

Obveznik poreza na dohodak od poljoprivredne proizvodnje i šumarstva jeste lice koje se kao vlasnik posjednik ili zakupac poljoprivrednog odnosno šumskog zemljišta bavi poljoprivredom i šumarstvom kao i lice koje ima udio u tako ostvarenom dohotku.

Ako više vlasnika, posjednika ili zakupaca zemljišta čine jedno domaćinstvo, a dohodak se oporezuje na osnovu katastarskog prihoda prema članu 23. ovog Zakona, porezni obveznik jeste jedan od punoljetnih članova domaćinstva kao predstavnik tog domaćinstva.

Ako dohodak od poljoprivrede i šumarstva koji se utvrđuje prema odredbama člana 24. ovog Zakona na način propisan odredbama člana 17. do 21. ovog Zakona, ostvaruje više lica, primjenjuju se odgovarajuće odredbe člana 16. ovog Zakona.

Član 23.

Dohodak od poljoprivrede i šumarstva jeste katastarski prihod koji se utvrđuje prema posebnim propisima, prema stanju na dan 31. decembra godine koja prethodi godini za koju se utvrđuje dohodak.

Član 24.

Porezni obveznik koji obavlja poljoprivrednu i šumarsku djelatnost utvrđuje dohodak u skladu s odredbama člana 17. do 21. ovog Zakona u slijedećim slučajevima:

1. Ako radi daljnje prodaje, od drugih otkupljuje poljoprivredne proizvode i šumarske proizvode, a prodajna vrijednost tih otkupljenih proizvoda iznosi više od ukupnog prometa njegovih poljoprivrednih proizvoda.

2. Ako dohodak od stočarstva, peradarstva, vinogradarstva, voćarstva, cvjećarstva, gljivarstva i drugih sličnih poljoprivrednih djelatnosti iznosi više od dvostrukog dohotka utvrđenog na osnovu katastarskog prihoda.

3. Ako obveznik zatraži da mu se dohodak umjesto prema katastarskom prihodu utvrđuje prema odredbama člana 17. do 21. ovog Zakona. Zahtjev za promjenu načina oporezivanja podnosi se prije početka kalendarske godine, a obavezuje poreznog obveznika najmanje dvije godine.

Član 25.

Ne oporezuje se dohodak od poljoprivrede i šumarstva od:

1. Zemljišta čije je iskorištavanje za poljoprivrednu i šumarsku proizvodnju na osnovu zakona zabranio nadležni organ.
2. Zemljišta stranih država pod zgradama i uz zgrade diplomatskih i konzularnih predstavništava, pod uslovom uzajamnosti, te na zemljišta međunarodnih organizacija.
3. Zemljišta pod zgradama i zemljišta uz zgrade do 1.000 m² ako obveznik, pored zemljišta uz stambenu zgradu, nema drugog zemljišta.

4. Dvorišta vjerskih objekata, mezarja i groblja, i drugih objekata koji služe za obavljanje vjerskih obreda.

5. Zemljišta na kojima su podignuti nasipi, kanali (prokopi) i njihove ustave, odbrambeni vrbaci i zasadi, rovovi i drugi objekti od zemlje potrebni za odbranu od poplave, za navodnjavanje ili odvodnjavanje te objekti za vojne potrebe.

6. Katastarskog prihoda čiji iznos ne prelazi 100 KM.

Oslobađanje iz stava 1. ovog člana prestaje čim se zemljište prestane koristiti u svrhu za koju je dato pravo na oslobađanje.

Prestanak razloga odnosno uslova za oslobađanje po ovom članu fizičko lice dužno je prijaviti nadležnoj organizacionoj jedinici Porezne uprave (u daljem tekstu: Porezna uprava) u roku od 30 dana od dana nastale promjene.

Član 26.

Poljoprivrednim domaćinstvom, u smislu ovog Zakona, smatra se domaćinstvo koje ima barem jednog člana domaćinstva osiguranog po propisima o zdravstvenom osiguranju odnosno penzijsko-invalidskom osiguranju poljoprivrednika.

Član 27.

Ako je uslijed elementarnih nepogoda, ratnih prilika, biljnih bolesti, štetočina ili drugih vanrednih događaja (u daljem tekstu: elementarne nepogode), koje fizičko lice nije moglo spriječiti, smanjen prinos na jednoj ili više zemljišnih parcela, smanjuje se katastarski prihod svake od tih parcela za onoliko postotaka za koliko je na njima smanjen prinos.

Porezni obveznik ima pravo na otpis poreza, ako iznos smanjenja katastarskog prihoda po osnovu stava 1. ovog člana naspram ukupnog katastarskog prihoda zemljišta iznosi više od 25%.

Član 28.

Porezni obveznik dužan je štetu nastalu smanjenjem prinosa prijaviti nadležnoj jedinici lokalne samouprave u roku od osam dana nakon njezina nastanka, a ako je šteta nastala neposredno prije ili za vrijeme žetve, prijavu treba podnijeti u roku od tri dana nakon njezina nastanka.

Ako je šteta nastala na većem dijelu katastarske općine, postupak za procjenu štete pokreće jedinica lokalne samouprave u rokovima iz stava 1. ovog člana.

Član 29.

Visinu štete utvrđuje komisija za procjenu štete od elementarnih nepogoda, koju imenuje nadležno tijelo jedinice lokalne samouprave.

Član 30.

Ako je došlo do promjene u vlasništvu zemljišta na osnovu odluke državnog tijela, na zahtjev poreznog obveznika ili na prijedlog državnog tijela, otpisat će porez na dohodak od poljoprivrede i šumarstva koji otpada na to zemljište, i to za sve godine u kojima porezni obveznik zbog tih promjena, nije ostvario dohodak od zemljišta, ako nije dovršen postupak o provođenju tih promjena u katastru.

Porez se otpisuje u smislu stava 1. ovog člana i kada vlasnik daruje zemljište jedinici lokalne samouprave.

e) DOHODAK OD IMOVINE I IMOVINSKIH PRAVA

Član 31.

Dohotkom od imovine i imovinskih prava smatra se dohodak koji porezni obveznik ostvari od izdavanja u zakup ili najam

nekretnina i pokretnih stvari, prihoda od autorskih prava, prava industrijskog vlasništva i drugih imovinskih prava.

Dohotkom iz stava 1. ovog člana smatra se i dohodak koji porezni obveznik ostvari od otuđenja nekretnina i imovinskih prava. Otudjenjem se smatra prodaja, zamjena i drugi prijenos uz naknadu. Dohodak čini razlika između prihoda utvrđenog prema tržišnoj vrijednosti nekretnine ili imovinskog prava koje se otuđuje i nabavne vrijednosti uvećane za rast proizvođačkih cijena industrijskih proizvoda. Troškovi otuđenja mogu se odbiti kao izdaci.

Dohodak od otuđenja nekretnine iz stava 2. ovog člana ne oporezuje se ako je nekretnina služila za stanovanje poreznom obvezniku ili izdržanim članovima njegove uže porodice (član 8. ovog Zakona) kao i u slučaju ako je nekretnina odnosno imovinsko pravo otuđeno nakon tri godine od dana nabave.

Dohodak od otuđenja nekretnina i imovinskih prava iz stava 2. ovog člana ne oporezuje se ako je otuđenje izvršeno između supružnika i drugih članova uže porodice te između razvedenih supružnika ako je otuđenje u neposrednoj vezi sa razvodom braka. Gubici od otuđenja nekretnina i imovinskih prava mogu se odbiti samo od dohotka od otuđenja nekretnina i imovinskih prava koji je ostvaren u istoj kalendarskoj godini.

Član 32.

Obveznik poreza na dohodak od autorskih prava i patenata i tehničkih unapređenja (u daljem tekstu: autorskih prava) je fizičko lice koje ostvari prihod od autorskih prava iz oblasti književnosti, nauke, umjetnosti i drugih oblasti stvaralaštva, kao što su:

1. pisana djela (knjige, brošure, članci, recenzije, publicistička i druga djela);
 2. govorna djela (predavanja, govori, besjede i drugo, osim predavanja po nastavno-naučnom programu škola i fakulteta);
 3. dramska i dramsko-muzička djela;
 4. koreografska i pantomimska djela;
 5. djela koja potiču iz folkloru;
 6. kinematografska djela;
 7. djela iz oblasti likovne umjetnosti i arhitekture;
 8. kartografska djela (kartografske i topografske karte);
 9. zbirke autorskih djela, kao što su enciklopedije, antologije, muzičke zbirke koje, s obzirom na izbor i raspored, predstavljaju samostalne tvorevine;
 10. nagrade na takmičenjima za izradu umjetničkih, naučnih, stručnih i ostalih autorskih djela, nagrade na takmičenjima za izradu idejnih projekata, te nagrade za postignuti uspjeh u nauci i umjetnosti, ako ovim Zakonom nije drugačije određeno, pod uslovom da je konkurs-natječaj za iste objavljen u javnim glasilima ili je napravljen pozivni konkurs;
 11. muzička djela sa riječima ili bez riječi;
 12. prihodi ostvareni izvođenjem programa narodne i zabavne muzike i drugih estradnih programa;
 13. prihodi ostvareni od patenata i tehničkih unapređenja.
- Osnovica poreza na dohodak od autorskih prava čini prihod ostvaren od autorskih prava, umanjeno za troškove koji su bili nužni za ostvarenje tog prihoda.

Kao nužni troškovi u smislu prethodnog stava priznaju se za:

1. kiparska djela, naučna djela, tapiserije izrađene u materijalu, keramoplastiku i umjetničku keramiku i vitraž - 55% ukupnog prihoda;
2. umjetničku fotografiju u oblasti nauke, kulture i privrede, zidno slikarstvo i slikarstvo u prostoru tehnikama: fresko, grafiko, mozaik, intarzija, emajl i sl., kostimografiju (pozorišni i modni kostimi izrađeni u materijalu) - 40% ukupnog prihoda;
3. slikarska djela, grafička djela, industrijsko oblikovanje sa izradom modela i maketa, sitnu plastiku, radove vizuelnih komunikacija, radove u oblasti unutrašnje arhitekture, idejna

rješenja (arhitektonskih objekata, rekonstrukcija urbanih cjelina i prostora) radovi na području hortikulture i vršenje umjetničkog nadzora nad izvođenjem sa izradom modela i maketa, umjetnička rješenja za scenografiju, stručna, književno-publicistička, prevodilačka, muzička i kinematografska djela, restauratorska i konzervatorska djela u oblasti kulture i umjetnosti - 30% ukupnog prihoda;

4. izvođenje umjetničkih djela (pjevanje, pozorišna i filmska gluma, recitovanje), snimanje filmova i idejne skice za tapiseriju i kostimografiju kada se ne izrađuju u materijalu - 25% ukupnog prihoda;

5. izvođenje umjetničkih djela sviranjem i ostala djela izuzev patenata i tehničkih unapređenja - 40% ukupnog prihoda;

6. za patente i tehnička unapređenja - 75% ukupnog prihoda.

Član 33.

Ako je autor kiparskog, naučnog ili stručnog djela, kao i slikarskog djela izrađenog na zidnim, stropnim ili podnim plohamo imao veće troškove od određenih u članu 32. priznat će mu se na njegov zahtjev stvarni troškovi, pod uslovom da podnese uredne isprave i dokumente (račune, otpremnice i sl.).

Od bruto prihoda ostvarenih autorskih prava, pored troškova iz prethodnog stava priznaju se i naknade koje autor plaća autorskoj agenciji, kao i drugim licima ovlaštenim za prodaju i naplatu prihoda od autorskih prava.

Licima koja nisu autori djela, nego samo nosioci imovinskih autorskih prava (nasljednici i drugi nosioci imovinskih autorskih prava), priznaju se kao troškovi samo naknade koje plaćaju autorskoj agenciji, kao i drugim licima ovlaštenim za prodaju i naplatu prihoda od autorskih prava.

Član 34.

Dohodak od imovine i imovinskih prava oporezuje se samo ako se ne radi o dohotku koji se oporezuje kao dohodak od samostalne djelatnosti, ako se na isti (dohodak od imovine i imovinskih prava) ne plaća porez na dobit.

Član 35.

Porez na dohodak od imovine plaća se od iznosa najamnine, odnosno zakupnine umanjenoj za 30%, a kod najamljivanja soba i postelja od iznosa najamnine umanjenoj za 50% na ime troškova ostvarivanja dohotka.

Porezni obveznik koji dohodak od imovine ostvaruje stalnim izdavanjem u najam odnosno zakup nekretnina, može na vlastiti zahtjev utvrđivati dohodak na način na koji se utvrđuje dohodak od privredne djelatnosti u skladu s članovima 17. do 21. ovog Zakona.

Ako više lica zajedno ostvaruje dohodak od imovine imovinskih prava na odgovarajući način se primjenjuju odredbe člana 16. ovog Zakona.

Član 36.

Ako je iznos najamnine odnosno zakupnine iz člana 35. stav 1. ovog Zakona prijavljen u nerealnom iznosu, Porezna uprava može utvrditi iznos najamnine, odnosno zakupnine prema tržišnim cijenama za najam, odnosno zakup nekretnina i pokretnih stvari.

2. POREZ NA IMOVINU

Član 37.

Obveznik poreza na imovinu je fizičko i pravno lice koje je vlasnik sljedeće imovine:

1. zgrade ili stana za odmor i rekreaciju (vikendice),
2. poslovne prostorije, stambene zgrade, stana i garaže koji se izdaju pod zakup,

3. motornih vozila,
4. plovnog objekta.

Obveznik poreza na imovinu je fizičko i pravno lice koje je vlasnik ili korisnik sljedeće imovine:

1. stola u kasinu,
2. automata za igru na sreću,
3. automata za zabavne igre.

Ako je imovina u vlasništvu ili je koristi više lica svako od njih je porezni obveznik srazmjerno dijelu vlasništva odnosno dijelu koji koristi.

Član 38.

Porez na imovinu plaća se godišnje u paušalnom iznosu i to:

1. za zgradu ili stan za odmor i rekreaciju - 1 KM po 1 m²
2. za poslovne prostorije, stambene zgrade, stan i garaže koji se izdaju u zakup
 - a) za poslovni prostor koji se izdaje pod zakup za:
 - kancelarijski, ugostiteljski ili trgovinski koji se nalazi u stambenoj zgradi, poslovno-stambenoj zgradi ili poslovnim centrima - 3 KM po 1 m²
 - kancelarijski, ugostiteljski ili trgovinski koji se nalazi u porodičnoj kući - 1,5 KM po 1 m²
 - skladišni, proizvodni - 1 KM po 1m²
 - b) za stambene zgrade i stan koji se izdaju pod zakup - 1,5 KM po 1 m².
 - c) za garaže koje se izdaju pod zakup - 1 KM po 1 m².
3. za motorna vozila i to:
 - a) putnička motorna vozila do 8 godina starosti:
 - do 1600 ccm 30 KM
 - od 1600ccm do 1800 ccm 50 KM
 - od 1800 ccm do 2000 ccm 70 KM
 - preko 2.000 ccm 150 KM
 - b) za putnička motorna vozila preko 8 godina starosti - 20 KM
 - c) za teretna motorna vozila do 10 godina starosti:
 - do 3 t 200 KM
 - od 3 t do 8 t 300 KM
 - preko 8 t 400 KM
 - d) za teretna motorna vozila preko 10 godina starosti - 100 KM
 - e) za motocikle preko 50 cm³
 - za motocikle preko 50 cm³ do 8 godina starosti - 70 KM
 - za motocikle preko 50 cm³ preko 8 godina starosti - 20 KM
4. za plovni objekat:
 - a) za plovni objekat do 5 m dužine 70 KM
 - b) za plovni objekat preko 5 m dužine 120 KM
 - c) skuteri - 20 KM
5. po stolu u kasinu - 5.000,00 KM
6. automati za igru na sreću - 1.200,00 KM
7. automat za zabavne igre - 500,00 KM.

Obveznici poreza na imovinu koja podlježe obavezi registracije, plaćaju porez na imovinu prije registracije kod nadležnog organa. Bez dokaza o plaćenom porezu ne može se izvršiti registracija.

Porez na imovinu iz tačke 1., 2., 4., 5., 6. i 7., stava 1. ovog člana plaća se u roku od 8 dana od krajnjeg roka za podnošenje prijave.

Član 39.

Porez na imovinu ne plaćaju:

1. Bosna i Hercegovina, Federacija Bosne i Hercegovine, kantoni i općine;
2. Strane države pod uslovom reciprociteta;

3. Invalidna lica za putnički automobil;

4. Vlasnici zgrada ili stanova za odmor ili rekreaciju koje koriste u stambene svrhe obveznik i članovi njegove porodice, izbjegla ili raseljena lica, kao i vlasnici objekata koji su oštećeni preko 70%;

5. Na imovinu koja vlasniku služi za obavljanje osnovne djelatnosti, osim imovine iz člana 37. stav 2.;

6. Vjerske institucije.

Član 40.

Ako u toku kalendarske godine dođe do promjene vlasništva nad imovinom novi vlasnik ne plaća porez na imovinu ako je taj porez naplaćen od ranijeg vlasnika.

Član 41.

Porez na imovinu razrezuje se unaprijed u godišnjem iznosu za imovinu zatečenu u posjedu poreznog obveznika na dan 1. januar godine za koju se razrez vrši, a za imovinu stečenu tokom godine u visini koja odgovara srazmjerno vremenu od dana sticanja do kraja godine, a na osnovu porezne prijave, odnosno evidencija i drugih pokazatelja.

Član 42.

Nadležni organi koji vode evidenciju o imovini iz člana 37. ovog Zakona na koju se plaća porez dužni su dostaviti Poreznoj upravi podatke o vlasnicima i njihovoj imovini.

Organ nadležan za izdavanje odobrenja za građenje objekata dužan je da o izdatim odobrenjima mjesečno obavještava Poreznu upravu na čijem području se vrši građenje i na čijem je području prebivalište vlasnika objekta.

3. POREZ NA NASLJEDE I POKLON

Član 43.

Obveznik poreza na nasljeđe i poklon je fizičko lice koje na području Kantona naslijedi ili primi na poklon imovinu podložnu plaćanju poreza na nasljeđe i poklon.

Obveznik poreza na nasljeđe i poklon je i lice koje naslijedi odnosno primi na poklon pravo uživanja ili korištenja nepokretnosti.

Obveznik poreza na nasljeđe i poklone je fizičko lice koje diobom primi više imovine nego što mu pripada po njegovom suvlasničkom pravu na taj dio.

Član 44.

Porezu na nasljeđe i poklon podlježe zemljište, zgrade i ostala nepokretna imovina, kao i pravo uživanja, odnosno korištenja, na toj nepokretnoj imovini koju fizičko lice stiče na području Kantona na osnovu Zakona o nasljeđivanju, odnosno ugovora o poklonu među živim ili za slučaj smrti.

Porezu na nasljeđe i poklon podlježe pokretna imovina čija prometna vrijednost prelazi 2.000 KM.

Član 45.

Porezna obaveza poreza na nasljeđe i poklon nastaje u trenutku pravosnažnog rješenja o nasljeđivanju odnosno u trenutku prijema poklona.

Poklon se smatra primljenim u trenutku potpisivanja ugovora o poklonu, a ako ugovor nije zaključen u trenutku kada je poklon primljen.

Ako je nepokretna imovina koja je predmet nasljeđivanja odnosno poklona opterećena pravom uživanja, obaveza nasljednika odnosno poklonoprimca za plaćanje poreza na nasljeđe odnosno poklon nastaje po prestanku prava na uživanje.

Član 46.

Osnovica poreza na nasljeđe i poklon je prometna vrijednost naslijeđene ili na poklon primljene imovine u času nastanka porezne obaveze po odbitku dugova i troškova koji terete imovinu na koju se plaća ovaj porez.

Osnovica iz prethodnog stava umanjuje se i za iznos sredstava koje nasljednik uloži u imovinu koja je predmet nasljeđa prije nastanka porezne obaveze.

Osnovica poreza za obveznike iz člana 43. stav 3. ovog Zakona je prometna vrijednost razlike između primljene imovine i imovine koja mu pripada po njegovom suvlasničkom pravu, a porez se obračunava po stopi iz člana 49. stav 2. i 3. ovog Zakona.

Član 47.

Prometnu vrijednost naslijeđene ili na poklon primljene imovine u prethodnom članu utvrđuje Porezna uprava na način i po postupku utvrđenom propisima o porezu na promet nepokretnosti i prava.

Član 48.

Vrijednost svih poklona primljenih u toku jedne kalendarske godine od istog poklonodavca čini jednu poreznu osnovicu.

Ako se nasljeđe ili poklon sastoji iz imovine na koju se plaća porez na nasljeđe i poklon iz imovine na koju se ovaj porez ne plaća, od vrijednosti imovine koja podliježe porezu odbija se srazmjerni dio ukupnih dugova, tereta i troškova koji otpadaju na tu imovinu.

Ako se nasljednik odrekne prava nasljedstva u korist drugog lica bez naknade, odnosno protunaknade stopa poreza na nasljeđe i poklon utvrđuje se prema prometnoj vrijednosti nasljednog dijela imovine, zavisno o nasljednom redu lica koje je naslijedilo imovinu na osnovu odreknuća u odnosu na ostavioca.

Član 49.

Porez na nasljeđe plaća se po stopi od 2%.

Porez na poklon plaća se po stopi od 3% do trećeg nasljednog reda.

Ostali poklonoprимci plaćaju porez na poklon po odredbama Zakona o porezu na promet nepokretnosti i prava.

Član 50.

Porez na nasljeđe i poklon ne plaća:

1. Nasljednik odnosno, poklonoprимac prvog nasljednog reda, braćni drug ako je u drugom nasljednom redu, roditelji kada nasljeđuju i primaju na poklon imovinu od djece;

2. Nasljednik drugog nasljednog reda, pod uslovom da je sa ostaviocem u trenutku njegove smrti živio u zajedničkom domaćinstvu.

3. Nasljednik koji nije u prvom nasljednom redu, a nasljeđuje poljoprivredno zemljište, a kome je poljoprivreda osnovno zanimanje.

Član 51.

Porez na nasljeđe i poklon ne plaća se na:

1. Predmete domaćinstva;

2. Na imovinu na koju nasljednik, odnosno poklonoprимac ne može steći pravo vlasništva, pravo uživanja, odnosno korištenja;

3. Na imovinu koja se ustupi bez naknade Bosni i Hercegovini, Federaciji, Kantonu, općini, vjerskim institucijama i humanitarnim organizacijama.

Porez uplaćen prije ustupanja ili poklona ne vraća se.

Član 52.

Razrez poreza na nasljeđe i poklon vrši Porezna uprava na čijem se području nalazi imovina. U slučaju da naslijeđena imovina, odnosno poklon, sadrži samo pokretnu imovinu, porez razrezuje Porezna uprava u prebivalištu obveznika poreza.

Ako se naslijeđena ili na poklon primljena imovina nalazi na području dvije ili više općina, razrez poreza vrši Porezna uprava prema mjestu gdje se imovina nalazi.

Član 53.

Primjerak pravosnažnog rješenja o nasljeđivanju i ugovora o poklonu nepokretno imovine, nadležni sud je dužan dostaviti Poreznoj upravi, u roku od 15 dana od pravosnažnosti rješenja, odnosno ovjere ugovora.

4. POREZ NA DOBITKE OD IGARA NA SREĆU

Član 54.

Obveznik poreza na dobitke od igara na sreću je lice koje ostvari pojedinačni dobitak od igara na sreću u iznosu većem od 100,00 KM.

Član 55.

Osnovica poreza na dobitke od igara na sreću je svaki pojedinačni dobitak od igara na sreću čiji je iznos veći od 100,00 KM.

Ako se dobitci od igara na sreću sastoje od stvari i prava, osnovica poreza na dobitke od igara na sreću je prometna vrijednost stvari ili prava u momentu ostvarenja dobitka.

Prometnu vrijednost iz prethodnog stava ovog člana utvrđuje nadležna Porezna uprava.

Član 56.

Porez na dobitke od igara na sreću plaća se po stopi od 20%.

Član 57.

Obračun i obustavu poreza na dobitke od igara na sreću vrši priređivač igre na sreću pri svakoj isplati dobitka.

5. POREZ NA POTROŠNJU ALKOHOLNIH I BEZALKOHOLNIH PIĆA U UGOSTITELJSTVU

Član 58.

Na potrošnju alkoholnih pića, piva, svih bezalkoholnih pića i mineralnih voda, kafe i čaja plaća se porez na potrošnju alkoholnih i bezalkoholnih pića u ugostiteljstvu (u daljem tekstu: porez na potrošnju pića).

Član 59.

Obveznik poreza na potrošnju pića je pravno lice i samostalni privrednik koji pruža ugosteljske usluge.

Član 60.

Osnovicu za obračun poreza na potrošnju pića iz člana 58. ovog Zakona čini prodajna cijena.

Član 61.

Porez na potrošnju pića plaća se:
- na potrošnju alkoholnih pića po stopi od 7%,
- na potrošnju bezalkoholnih pića po stopi od 3%.

Član 62.

Obračun poreza na potrošnju pića vrši obveznik poreza u času izvršene potrošnje alkoholnih i bezalkoholnih pića.

III. POSTUPAK ZA UTVRĐIVANJE I NAPLATU POREZA**Utvrđivanje poreza**

Član 63.

Obveznici poreza na dohodak dužni su porez plaćati na način i u rokovima utvrđenim ovim Zakonom i propisima donesenim na osnovu zakona.

Porez na dohodak za koji se podnosi porezna prijava obračunava se godišnje.

Član 64.

Za neblagovremeno plaćanje poreza propisanih ovim Zakonom plaća se zatezna kamata po stopi utvrđenoj propisima Federacije Bosne i Hercegovine za neblagovremeno plaćanje javnih prihoda.

Član 65.

Obveznicima poreza na nasljeđe i poklon porez se utvrđuje rješenjem Porezne uprave.

Obveznici poreza na naslijeđe i poklone dužni su razrezani porez platiti u roku od 15 dana od dana prijema rješenja.

Član 66.

Pravna lica, obveznici poreza na potrošnju pića dužni su porez na potrošnju pića platiti u roku od 5 dana po isteku sedmice u kojoj je izvršena potrošnja pića, a fizička lica u roku od 15 dana po isteku mjeseca u kome je izvršena potrošnja pića.

Porezna prijava

Član 67.

Obveznici poreza na dohodak, osim obveznika poreza od poljoprivrede i šumarstva i obveznika poreza na potrošnju pića dužni su podnijeti poreznu prijavu Poreznoj upravi nakon isteka poreznog razdoblja (kalendarske godine).

Porezna prijava podnosi se Poreznoj upravi do kraja februara nakon isteka godine za koju se utvrđuje porez.

Oblik i sadržaj porezne prijave propisat će se posebnim propisom, kojeg donosi Ministar finansija.

Član 68.

Obveznicima poreza na dohodak koji ne podnesu poreznu prijavu ili ako su podaci iz porezne prijave netačni ili nepotpuni porez na dohodak utvrđuje se u postupku prema odredbama ovog Zakona, Zakona o Poreznoj upravi Federacije Bosne i Hercegovine, kao i propisa donesenih na osnovu ovih zakona.

Porez na dohodak, odnosno razlika između utvrđenog poreza i plaćenih akontacija plaća se u roku osam dana od krajnjeg roka za podnošenje porezne prijave.

Ako je porezni obveznik platio više akontacije od utvrđenog poreza na dohodak, više plaćeni porez na zahtjev poreznog obveznika vraća se poreznom obvezniku ili mu se uračunava u akontaciju za iduće razdoblje ili se sa više plaćenim porezom postupa u skladu sa odredbama Zakona o Poreznoj upravi Federacije Bosne i Hercegovine i propisima donesenim na osnovu zakona.

Član 69.

Ako je porezni obveznik tokom godine ostvario dohodak samo od plaće ili penzije, ne podnosi poreznu prijavu, a plaćene akontacije poreza smatraju se konačno utvrđenim porezom na dohodak.

Ako porezni obveznik iz stav 1. ovog člana ostvari dohodak iz više odnosa po osnovu rada ili druge vrste dohotka ili ako je Porezna uprava zatražila od poreznog obveznika da naknadno plati porez od rada kod poslodavca ili ako je porezni obveznik primio dohodak od rada kod poslodavca izravno iz inostranstva, dužan je podnijeti poreznu prijavu iz člana 67. ovog Zakona.

Član 70.

Obveznici poreza na imovinu dužni su podnijeti poreznu prijavu Poreznoj upravi do kraja februara godine u kojoj se vrši razrez.

Oblik i sadržaj porezne prijave propisat će se posebnim propisom kojeg donosi Ministar finansija.

Ako obveznik poreza u toku godine stekne imovinu na koju se plaća porez na imovinu dužan je podnijeti poreznu prijavu u roku od 15 dana od dana sticanja imovine.

Član 71.

Pravna lica, obveznici poreza na potrošnju pića dužni su podnijeti mjesečnu poreznu prijavu o obračunatom i plaćenom porezu Poreznoj upravi u roku od 15 dana po isteku mjeseca, a fizičko lice do kraja mjeseca za protekli mjesec.

Pored mjesečne prijave obveznici poreza iz prethodnog stava dužni su podnijeti i godišnju konačnu prijavu o obračunatom i plaćenom porezu.

Porezna prijava podnosi se do 28. februara tekuće godine za proteklu godinu.

Obrasce poreznih prijava propisuje ministar finansija.

Član 72.

Obveznici poreza koji su dužni podnijeti poreznu prijavu za razrez poreza moraju blagovremeno javnim pozivom biti pozvani na podnošenje prijave.

Javni poziv za podnošenje porezne prijave objavljuje Porezna uprava.

Utvrđivanje akontacije poreza po pojedinim vrstama dohotka

Član 73.

Kod dohotka od rada kod poslodavca akontaciju poreza obračunava, obustavlja i uplaćuje poslodavac, odnosno isplatišilac dohotka. Dužnik poreza na dohodak od rada kod poslodavca je posloprimac, odnosno penzioner.

Porez na dohodak od rada kod poslodavca obračunava se prema propisima koji važe na dan isplate.

Porezna osnovica poreza na dohodak od rada kod poslodavca jest iznos svih primljenih dohodaka od takvog rada tokom mjeseca, umanjena za petorostruki osnovni lični odbitak i olakšice iz člana 8. stav 1. ovog Zakona, a utvrđena od strane Porezne uprave u poreznoj kartici poreznog obveznika.

Poslodavac, odnosno isplatilac penzije dužan je, za račun posloprimca, kod svake isplate plate, odnosno penzije obustaviti porez.

Član 74.

Porezni obveznici koji dohodak od rada kod poslodavca ostvare neposredno iz inostranstva, dužni su na taj dohodak sami obračunavati akontaciju poreza od takvog rada i uplatiti ga u roku od sedam dana od primitka dohotka.

Porezni obveznik zaposlen u diplomatskom, odnosno konzularnom predstavništvu strane države, međunarodnoj organizaciji ili predstavništvu ili organizaciji koja na teritoriji Bosne i Hercegovine ima diplomatski imunitet, kada je porezni obveznik po ovom Zakonu, dužan je sam obračunavati akontaciju poreza od rada kod poslodavca na način iz stava 1. ovog člana.

Član 75.

Strana organizacija koja ne uživa diplomatski imunitet u Bosni i Hercegovini i službenici te organizacije sa sjedištem odnosno prebivalištem u Bosni i Hercegovini dužni su pri isplati dohotka od rada kod poslodavca zaposlenim građanima ili stranim državljanima obračunati porez po odredbama ovog Zakona i uplatiti ga u roku od sedam dana od dana isplate.

Član 76.

Način plaćanja poreza na dohodak od rada kod poslodavca detaljnije se uređuje pravilnikom koji donosi Ministar finansija.

Pravilnikom iz stava 1. ovog člana propisuje se oblik i sadržaj porezne kartice koju izdaje Porezna uprava zaposlenom, kao i porezne kartice koje vode poslodavci.

Poslodavci odnosno isplatioci penzije dužni su je čuvati dok traje radni odnos posloprimca, odnosno dok se isplaćuje penzija.

Jedan popunjeni primjerak porezne kartice poslodavac dostavlja Poreznoj upravi do 31. januara tekuće godine za proteklu godinu.

Član 77.

Kod dohotka od samostalne djelatnosti mjesečna akontacija poreza plaća se na osnovu utvrđenog poreza na dohodak iz prethodne godine.

Na početku obavljanja samostalne djelatnosti akontacije se utvrđuju na osnovu podataka koje porezni obveznik iskaže u poreznoj prijavi o predviđenom iznosu svog dohotka (člana 80.).

Ako porezni obveznik nije podnio poreznu prijavu za prethodnu godinu, ne vodi ili netačno vodi knjige ili nije dao podatke o predviđenom dohotku prema stavu 2. ovog člana, mjesečne akontacije utvrđuje Porezna uprava na način i po postupku predviđenom u Zakonu o Poreznoj upravi Federacije Bosne i Hercegovine.

Porezna uprava može na osnovu obavljenog nadzora ili drugih podataka o poslovanju poreznog obveznika s kojima raspolaže, izmijeniti i utvrditi nove iznose mjesečnih akontacija, u skladu sa Zakonom.

Član 78.

Izuzetno Porezna uprava može, na zahtjev poreznog obveznika, dozvoliti izmjenu visine utvrđene akontacije.

Zahtjev se zasniva na podnesku, koji sadrži sve bitne sastojke porezne prijave, što se odnosi na protekli period tekuće godine.

Član 79.

Akontacije poreza na dohodak plaćaju se mjesečno i to do 15-og u mjesecu za prethodni mjesec.

Član 80.

Porezni obveznik koji počinje obavljati samostalnu djelatnost dužan je o tome izvijestiti Poreznu upravu u roku od osam dana od dana početka obavljanja djelatnosti, odnosno podnijeti poreznu prijavu o predviđenom iznosu dohotka.

Član 81.

Organi kantonalne uprave, općinske službe za upravu i drugi nadležni organi dužni su Poreznoj upravi dostaviti sva odobrenja za obavljanje privredne djelatnosti i slobodnih zanimanja, te rješenja o privremenoj obustavi i prestanku djelatnosti, odnosno zanimanja istovremeno s dostavom odobrenja, odnosno rješenja poreznom obvezniku.

Član 82.

Ako se dohodak od poljoprivrede i šumarstva obračunava po katastarskom prihodu (član 23.) utvrđuje se akontacija poreza rješenjem Porezne uprave, koje se dostavlja poreznom obvezniku do 1. aprila godine za koju se utvrđuje porez.

Akontacija poreza prema stavu 1. ovog člana plaća se tromjesečno u jednakim dijelovima od ukupno utvrđenog poreza i to do isteka tromjesečja. Ako nije doneseno novo rješenje akontacije se plaćaju u visini iznosa koji su utvrđeni za prethodnu godinu.

Ako porezni obveznik uz katastarski dohodak ima i druge dohotke od samostalne djelatnosti ili imovine, akontacije poreza plaćaju se i za katastarski dohodak u mjesečnim ratama po postupku i na način iz člana 77. i 79. ovog Zakona.

Član 83.

Nadležna uprava za katastar dužna je Poreznoj upravi dostaviti podatke o katastarskom prihodu poreznih obveznika do 15. februara godine za koju se utvrđuje porez, ako su nastale promjene u posjedovnom stanju, kulturi i bonitetu zemljišta te popis novih posjednika s naznakom njihova prebivališta, jedinstvenog matičnog broja građana, katastarskog broja, katastarskog sreza, katastarske općine, površine zemljišta i katastarskog prihoda.

Član 84.

Obveznicima poreza od poljoprivrede i šumarstva, kojima je poljoprivreda osnovni izvor prihoda, utvrđeni porez iz člana 82. ovog Zakona smatra se konačno utvrđenim porezom tako da ovi obveznici ne podnose prijavu za utvrđivanje poreza na dohodak.

Ako porezni obveznik ostvaruje i druge dohotke, katastarski se dohodak i plaćene akontacije moraju iskazati u godišnjoj prijavi.

Član 85.

Obveznici poreza na dohodak od imovine dužni su Poreznoj upravi prijaviti početak izdavanja u najam, odnosno zakup pokretnih stvari i nekretnina te prihoda od imovinskih prava u roku od osam dana od početka ostvarivanja prihoda.

Kod dohotka od imovine i imovinskih prava akontacije poreza plaćaju se po postupku i na način iz člana 77. i 79. ovog Zakona, a porez na iznajmljivanje soba i postelja iz člana 35. stava 1. ovog Zakona plaća se pri svakoj naplati zakupnine i smatra se konačnim porezom.

Obračun, obustavu i uplatu poreza od autorskih prava vrši isplatilac prihoda prilikom isplate, a porezni obveznik je dužan

Poreznoj upravi podnijeti godišnju poreznu prijavu u kojoj će iskazati, na osnovu potvrde isplatioca, ukupno ostvareni prihod, kao i obračun i uplatu poreza.

Jedan primjerak potvrde isplatilac je dužan dostaviti Poreznoj upravi do kraja januara za prethodnu godinu.

Dostavljanje izvještaja i druge obaveze

Član 86.

Pravna i fizička lica i drugi subjekti dužni su Poreznoj upravi na njen zahtjev dostaviti podatke o isporučenoj robi i uslugama što su im obavili obveznici poreza na dohodak te druge propisane podatke o isplaćenim plaćama, penzijama i drugim primanjima zaposlenih radnika za godinu za koju se utvrđuje porez na dohodak.

Banke i druge finansijske organizacije dužne su Poreznoj upravi na njezin zahtjev dostaviti podatke o prometu preko računa za sve građane. Na zahtjev Porezne uprave dužne su te podatke za pojedine građane dostaviti i tokom godine.

Pravna i fizička lica i drugi subjekti iz stava 1. i 2. ovog člana dužni su Poreznoj upravi omogućiti uvid u poslovne knjige i evidencije radi utvrđivanja podataka potrebnih za utvrđivanje poreza.

Član 87.

Prihodi, odnosno akontacije za isporučenu robu, ili obavljene usluge po bilo kojoj osnovi, koje ostvare građani od jedinica lokalne samouprave, državnih tijela, državnih fondova, poduzetnika i drugih pravnih lica, kao i lica koja ostvaruju dohodak od privrednih djelatnosti i slobodnih zanimanja, isplaćuju se građanima putem računa.

Posebnim propisom, kojeg donosi Ministar finansija, će se propisati koji se prihodi iz stava 1. ovog člana mogu isplatiti u gotovom novcu mimo računa.

Član 88.

Radi pravilnog utvrđivanja prihoda, Porezna uprava dužna je tokom godine prikupljati podatke, snimati promet i obavljati druge radnje potrebne za utvrđivanje poreza.

Porezna uprava ima pravo pregledati poslovne knjige i poslovne prostorije radi prikupljanja podataka potrebnih za utvrđivanje poreza, a porezni obveznik dužan je omogućiti Poreznoj upravi pregled poslovnih knjiga i poslovnih prostorija.

Član 89.

Porezni obveznici dužni su poslovne knjige i otpremnice koje su osnova knjiženja te propisane evidencije držati u poslovnoj prostoriji ili kod ovlaštenog knjigovodstvenog servisa, odnosno u stanu, ako nemaju poslovnu prostoriju, kako bi bile dostupne Poreznoj upravi.

Član 90.

Porezna uprava dužna je poreznom obvezniku, na njegov zahtjev, dopustiti da razmotri isprave i druge podatke na osnovu kojih mu se utvrđuje obaveza plaćanja poreza, te podatke o utvrđenom i plaćenom porezu.

Član 91.

Podaci o dohotku i poreznoj osnovici u visini u kojoj ih je prijavio porezni obveznik u visini u kojoj su utvrđeni u postupku utvrđivanja poreza mogu se davati na zahtjev sudova, državnih organa i državnih tijela.

Drugi podaci koje službena lica Porezne uprave saznaju u postupku razreza i naplate poreza, jesu službena tajna.

Član 92.

U opravdanim slučajevima Porezna uprava može obvezniku poreza odobriti odgodu plaćanja dospjelog poreza ili plaćanje poreza u više rata, u skladu sa Zakonom o Poreznoj upravi Federacije Bosne i Hercegovine i propisa donesenih na osnovu zakona.

Porezno uvjerenje

Član 93.

Kantonalni organi uprave, općinske službe za upravu kao i drugi subjekti mogu od poreznih obveznika tražiti porezno uvjerenje o izmirenim obavezama, odnosno uvjerenje da nije zadužen porezima, kao uslov za ostvarivanje njihovih prava, kada je to utvrđeno posebnim propisom.

Žalba

Član 94.

Protiv akta Porezne uprave donesenog u prvom stepenu može se izjaviti žalba nadležnom organu za rješavanje po žalbi, u skladu sa Zakonom o Poreznoj upravi Federacije Bosne i Hercegovine.

Obnova postupka

Član 95.

Porezna uprava, koja je donijela rješenje o utvrđivanju poreza kojim je okončan postupak utvrđivanja poreza može sama ili na zahtjev obveznika obnoviti postupak u roku od pet godina nakon njegove pravosnažnosti prema odredbama Zakona o upravnom postupku.

Prisilna naplata poreza

Član 96.

Od poreznog obveznika koji dospjeli porez nije platio u propisanom roku i od jamca za naplatu poreza koji se plaća po odbitku, koji nije obračunao i uplatio porez u propisanom roku (u daljem tekstu: porezni dužnik), porez se prisilno naplaćuje u skladu sa načinom i postupcima prisilne naplate propisane Zakonom o Poreznoj upravi Federacije Bosne i Hercegovine.

Jamstvo

Član 97.

Ako više lica ostvaruje prihod zajedničkim obavljanjem djelatnosti solidarno jamče, za obaveze po osnovu zajedničkog obavljanja djelatnosti.

Član 98.

Porezni dužnik koji otuđi mašine, uređaje ili drugi inventar što su mu služili za obavljanje djelatnosti ili otuđi radnju u cjelini, dužan je prethodno podmiriti svoje porezne obaveze.

Ako novi vlasnik preuzme imovinu iz stava 1. ovog člana a porez nije plaćen za naplatu dospjelog poreza jamči solidarno s poreznim dužnikom i novi vlasnik do visine vrijednosti preuzete imovine.

Član 99.

Građanin koji drži u zakupu zemljište na koje se plaća porez od poljoprivrede i šumarstva, solidarno odgovara sa zakupodavcem za dužni porez što otpada na to zemljište do visine zakupnine, odnosno do vrijednosti napolice.

Član 100.

Lica koja vlasnicima putujućih zabavnih radnji, odnosno priređivačima zabavnih priredbi uz naplatu ili besplatno ustupaju svoj stambeni ili poslovni prostor odgovaraju solidarno s poreznim obveznikom za sve porezne obaveze.

Zastara

Član 101.

Pravo na utvrđivanje porezne obaveze te pravo na pokretanje prekršajnog postupka zbog povreda odredbi ovog Zakona zastarijeva za pet godina nakon isteka godine u kojoj je trebalo utvrditi porezne obaveze, odnosno u kojoj su povrijeđene odredbe ovog Zakona.

Pravo na naplatu poreza, kamata i troškova prisilnog izvršenja i novčanih kazni zbog povreda odredbi ovoga Zakona zastarijeva za pet godina nakon isteka godine u kojoj ih je trebalo naplatiti.

Pravo poreznog obveznika na povrat nepravilno ili više plaćenih iznosa na ime poreza, kamata troškova prisilnog izvršenja i novčanih kazni zastarijeva za pet godina nakon isteka godine u kojoj su oni naplaćeni.

Član 102.

Tok zastare prava na utvrđivanje poreznih obaveza prekida se svakom službenom radnjom Porezne uprave radi utvrđivanja porezne obaveze koja je stavljena do znanja poreznom obvezniku.

Tok zastare prava na naplatu poreza, kamata, troškova, prisilnog izvršenja i novčanih kazni prekida se svakom službenom radnjom što je poduzima Porezna uprava radi naplate koja je stavljena do znanja poreznom obvezniku.

Tok zastare prava na povrat nepravilno ili više plaćenog poreza, kamate troškova prisilnog izvršenja i novčanih kazni prekida se svakom radnjom što je obveznik, odnosno kažnjeno lice poduzima kod Porezne uprave radi povrata.

Nakon svakog prekida zastara počinje teći iznova i nastupa kad protekne onoliko vremena koliko je potrebno za određeno zastarijevanje.

Apsolutna zastara nastupa nakon isteka deset godina od dana kada je prvi put počela teći.

Član 103.

Propisi o zastari potraživanja, ako nisu u suprotnosti s ovim Zakonom, primjenjuju se i na zastaru prava utvrđivanja i naplate poreznih obaveza.

IV. KAZNE NE ODREDBE

Član 104.

Novčanom kaznom od 250,00 KM do 1.250,00 KM kaznit će se za prekršaj fizičko lice:

1. Porezni obveznik koji ne podnese poreznu prijavu u propisanom roku (član 67. stav 2., član 70. stav 1. i član 71. stav 1. i 3.)
2. Porezni obveznik koji iskaže netačne ili nepotpune podatke u poreznoj prijavi ili ne plati porez u propisanom roku (član 38. stav 2. i 3., član 65. stav 2. i član 68. stav 1. i 2.)

3. Poslodavac, odnosno isplatilac koji ne obračuna ili ne uplati akontaciju poreza od rada kod poslodavca, fizička lica koja su dužna sama obračunati i uplatiti porez, te isplatioci koji su dužni obračunati porez (član 57., član 73. stav 4., član 74. i član 85. stav 3.)

4. Porezni obveznik koji ne vodi ili netačno ili neažurno vodi poslovne knjige ili ne izdaje račune ili ne obračuna u potpunosti ili djelimično akontaciju poreza (član 18. stav 3. i 4. i član 77. stav 2.)

5. Porezni obveznik koji ne plaća mjesečnu akontaciju poreza u propisanom roku (član 79.)

6. Porezni obveznik ako ne uplati porez na potrošnju pića (član 66.)

7. Porezni obveznik koji počinje obavljati samostalnu djelatnost, a o tome ne izvijesti Poreznu upravu (član 80.) ili ne obavijesti Poreznu upravu o prestanku razloga za oslobođanje (član 25. stav 3.)

8. Porezni obveznik koji Poreznoj upravi ne prijavi početak izdavanja u najam, odnosno zakup nekretnina i pokretnih stvari u propisanom roku i ne plaća akontaciju poreza u propisanom roku (član 85. stav 1. i 2.)

Član 105.

Novčanom kaznom od 500,00 KM do 7.500,00 KM kaznit će se za prekršaj pravno lice:

1. Porezni obveznik koji ne podnese poreznu prijavu u propisanom roku (član 67. stav 2., član 70. stav 1. i član 71. stav 1. i 3.)

2. Porezni obveznik koji iskaže netačne ili nepotpune podatke u poreznoj prijavi ili ne plati porez u propisanom roku (član 38. stav 2. i 3., član 65. stav 2. i član 68. stav 1. i 2.)

3. Porezni obveznik koji ne vodi ili netačno ili neažurno vodi poslovne knjige ili ne izdaje račune (član 18. stav 3. i 4.)

4. Porezni obveznik ako ne uplati porez na potrošnju pića (član 66.)

5. Porezni obveznik koji Poreznoj upravi ne prijavi početak izdavanja u najam, odnosno zakup nekretnina i pokretnih stvari u propisanom roku i ne plaća akontaciju poreza u propisanom roku (član 85. stav 1. i 2.)

Za prekršaje iz stava 1. ovog člana odgovorna lica u pravnom licu kaznit će se novčanom kaznom od 150,00 KM do 750,00 KM.

Član 106.

Novčanom kaznom od 500,00 KM do 7.500,00 KM za prekršaj će se kazniti pravno lice, organ i organizacija koja ne postupi u skladu sa članom 42., 81., 83. i 86.

Za prekršaj iz stava 1. ovog člana odgovorna lica u pravnom licu kaznit će se novčanom kaznom od 150,00 KM do 750,00 KM.

Član 107.

Novčanom kaznom od 500,00 KM do 3.000,00 KM za prekršaj će se kazniti pravno i fizičko lice koje isplate građanima ne izvrši preko računa (član 87.)

Za prekršaje iz stava 1. ovog člana odgovorna lica u pravnom licu kaznit će se novčanom kaznom od 150,00 KM do 750,00 KM.

Član 108.

Novčanom kaznom od 250,00 KM do 1.250,00 KM za prekršaj će se kazniti porezni obveznik koji poslovne knjige, otpremnice te propisane evidencije ne drži u poslovnoj prostoriji ili kod ovlaštenog servisa ili u stanu ili ometa pregled poslovnih knjiga i poslovnih prostorija (član 89.)

Član 109.

Za prekršaj iz člana 104. tačke 4. i 5. i člana 107. ovog Zakona učinjene u povratu, Porezna uprava, uz novčanu kaznu,

izreći će i zaštitnu mjeru zabrane obavljanja djelatnosti u trajanju od 3 mjeseca do 1 godine.

Izuzetno od odredbi stava 1. ovog člana, ako bi zaštitna mjera zabrana obavljanja djelatnosti, izazvala veće štetne posljedice i poremećaje u privredi ili veće otpuštanje zaposlenih radnika, može se za prekršaj u povratu izreći samo novčana kazna.

V. PRIJELAZNE I ZAVRŠNE ODREDBE

Član 110.

Ministar finansija će u roku od 60 dana od dana stupanja na snagu ovog Zakona uskladiti provedbene propise sa odredbama ovog Zakona.

Član 111.

Danom stupanja na snagu ovog Zakona, prestaje da važi Zakon o kantonalnim porezima "Službene novine Tuzlansko-podrinjskog kantona", broj: 5/98).

Član 112.

Ovaj Zakon stupa na snagu danom objavljivanja u "Službenim novinama Tuzlanskog kantona", a primjenjivat će se od 1. 1. 2004. godine.

Bosna i Hercegovina
Federacija Bosne i Hercegovine
TUZLANSKI KANTON
Skupština
Broj: 01-02-249-18/03
Tuzla, 28. 11. 2003. godine

Predsjednik

Skupštine Tuzlanskog kantona,

Amir Fazlić, v.r.

273

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00 i 14/02), na prijedlog Vlade Tuzlanskog kantona, Skupština Tuzlanskog kantona, na sjednici održanoj 28. 11. 2003. godine, donosi

ZAKON

O IZMJENAMA I DOPUNAMA ZAKONA O PRIPADNOSTI JAVNIH PRIHODA NA PODRUČJU TUZLANSKOG KANTONA I FINANSIRANJU TUZLANSKOG KANTONA

Član 1.

U Zakonu o pripadnosti javnih prihoda na području Tuzlanskog kantona i finansiranja Tuzlanskog kantona ("Službene novine Tuzlanskog kantona", br. 4/00, 3/01, 7/01, 5/02 i 3/03), u članu 4. stav 1., iza tačke 3., dodaje se nova tačka 4. koja glasi:

"Porez na dobitke od igara na sreću i porez na potrošnju alkoholnih i bezalkoholnih pića u ugostiteljstvu utvrđeni kantonalnim propisima".

Dosadašnje tačke 4., 5., 6. i 7. postaju tačke 5., 6., 7. i 8.

Član 2.

U članu 7. stav 2. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 3. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 4. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 5. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 6. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 7. alineja 5., mijenja se i glasi:

"100% porezi fizičkih i pravnih lica utvrđeni kantonalnim propisima, izuzev poreza na dobitke od igara na sreću i poreza na potrošnju alkoholnih i bezalkoholnih pića u ugostiteljstvu".

U članu 7. stav 8., mijenja se i glasi:

"Općinama pripadaju prihodi od naknada građana utvrđenih općinskim propisima, prihodi od komunalnih naknada, novčanih kazni i drugi prihodi od naknada ustanovljenih općinskim propisima".

Član 3.

Ovaj zakon stupa na snagu danom objavljivanja u "Službenim novinama Tuzlanskog kantona", a primjenjivat će se od 1. 1. 2004. godine.

Bosna i Hercegovina
Federacija Bosne i Hercegovine
TUZLANSKI KANTON
Skupština
Broj: 01-02-665-6/03
Tuzla, 28. 11. 2003. godine

Predsjednik

Skupštine Tuzlanskog kantona,

Amir Fazlić, v.r.

274

Na osnovu člana 14. stav 1. i člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00 i 14/02), na prijedlog Vlade Tuzlanskog kantona, Skupština Tuzlanskog kantona, na sjednici održanoj 28. 11. 2003. godine, donosi

ZAKON

O PRENOŠENJU NADLEŽNOSTI ZA VOĐENJE PRVOSTEPENOG UPRAVNOG POSTUPKA U OBLASTI OGRANIČENJA PRAVA VLASNIKA, ODNOSNO KORISNIKA ZEMLJIŠTA

Član 1.

Ovim zakonom se, na općinsku službu nadležnu za imovinsko-pravne poslove, prenosi nadležnost vođenja prvostepenog upravnog postupka za donošenje rješenja iz člana 151. stav 2. i člana 152. stav 2. Zakona o vodama ("Službene novine Federacije Bosne i Hercegovine", broj 18/98).

Član 2.

O žalbi izjavljenoj protiv rješenja općinske službe rješava Ministarstvo prostornog uređenja i zaštite okolice Tuzlanskog kantona.